

萬病驗方大全

海上名醫鑒定



萬病回春

錢樵拜題



序

青浦陸士諤先生。邃於醫學。蒞滬行道有年。曩嘗接其醫欸。審知爲績學士。平生譔述甚富。著有醫學南針一書。精稿明晰。足爲後學津梁。今其諸嗣清潔英台。秉性聰慧。爲後起秀。旣承家學之淵源。又竭畢生之心力。廣摭博採。羅致歷來經驗良方。彙成一書。顏曰萬病驗方大全。別類分門。朗如列宿。其於病情治法。纖屑靡遺。洋洋乎大觀也哉。擬付剞劂。藉廣流傳。介予一言以爲符。予見夫坊間向有驗方新編。一刻久已膾炙人口。以此絜彼。尤覺無美不收。無法不備。他日出版。定占無遠不屆矣。然則此書也。固不特有益於齊民。亦且有益於我醫界。固宜各置一編。庋諸座右。以備參考。於我醫界前途。不無小補者也。爰綴數言。以弁其首。民國十有九年暮春之初。夏紹庭敍於九芝山館。

序

陸君守先。青邑人也。爲明文定公嫡裔。博通經籍。妙用刀圭。廿四番風遍栽杏樹。八千餘紙鈔錄奇書。女子亦識韓康。士夫羣推秦綏。菑嗣清潔。毓靈毓秀。肯構肯堂。飄飄乎橫海之魚龍。皎皎乎緱山之鸞鶴。况能志勤學道。訓稟經畬。勉守青囊。精言白石。待膳侍寢之暇。博極羣書。聞詩聞禮之餘。耽窺奧衍。餐花夢裏。貯錦胸中。搖虎毫而成文。不媿雲間才調。喜龜蒙之繼德。依然礪石清風。爰著萬病驗方大全。而丐序於余。竊以利物莫大於行醫。事親先貴於養志。若清潔者。六淫六疾。洞悉乎陰陽。五色五聲。端詳乎望問。婆心齊世。妙手回春。仁遠乎哉。可謂孝矣。今者歐風東漸。羣慕西醫。動徹斷腸。輕言剝胃。而不知世無仲景。漫效穿胸。人非淳于。胡能理腦。而徒爲換心之魯扈。刮骨之雲長。不亦惑乎。嗟嗟。靈液八成。元砂七返。扶危救急。起死回生。迺中醫之神方。實西術所未逮。清潔斯作。獨搜祕傳。頗多奇效。誠百發而百中。如養叔之射功。當一人置一編。貴洛陽之紙價。殆補金匱之亡也。抑拾靈樞之遺乎。達飲上池之水。學愧療龍。結桐麓之廬。途慚老馬。願偕喬梓採藥蓬萊。尋得仙丹。共登壽域。噫。三折肱。九折臂。勉紹家風。一爲巧。百爲良。保茲國粹。是爲序。歲次上章敦牂春莫餘干戴達夫序於上海中醫學會

序

一方不能療萬病。而萬病必自有其一方。誠然此病得此方。則風寒暑燥之不時。疾痛煩疴之間作。不必經醫藥展轉之繁勞。而病良已。甯非天下之快事。而人生之幸福乎。此陸君清濤所以有萬病驗方大全之編輯也。清濤君之尊甫守先先生。懸壺海上。爲世名醫。清濤君承家學。發宏願。痼瘵在抱。集成此書。其取材也至博。其抉擇也至精。其造端也至大。其分類也至晰。要之其致力也致劬。而其用心也至苦。欲使知名之驥。索可按圖。如意之珠。采無遺網。衆置一編。不啻聚多數名醫於一室。養生之術。既豫得於平時。對症之藥。復不失於臨事。其爲福德。何可思量。老子有云。聖人不病。夫唯病病。是以不病。言雖玄渺。理實平常。蓋長生久視之道。不外延年却病之方。三寶曰慈。陸君此編。伎也而進於道矣。

中華民國十九年四月

吳興蔡濟平拜撰

序

周櫟園云。古人非自驗之方。卒不記之於集。從知醫方之驗。驗方之輯。亦重要矣哉。昔華佗弟子吳普輯華佗方。當爲驗方成書之濫觴。嗣後如姚僧垣集驗方。甄立言古今錄驗方。李迅集驗背疽方。倪維德東垣試效方。洪氏集驗方等。彙集驗方。廣衍流派。按方療疾。效如桴鼓。至包括衆病。條目完備者。尤以類編南化經驗方大成。暨晚近經驗各種祕方輯要。驗方新編等。爲益臻精詳。惟上列各書。或失其傳本。或刻有舛錯。令人輒興闕文闕疑之感。實則醫學導源於靈素。由漢而後。代有變遷。蓋民衆疾病。時有不同。藥物性味。地有區別。古方不能盡合於今病。復有古無是方。而今有是病。得後起英彥。悉心闡究。致補前人所未備。發前人所未發。如溫疫盛行於近代。用辛寒開閉結。芳香驅穢濁之療治法。乃近賢所發明也。又如喉痧。古無是證。今則盛行各大埠。用辛涼清解等療治法。亦近賢所發明也。今陸清潔君有萬病驗方之輯。凡於古方所略之病證。今病應治之方藥。搜羅宏富。攷訂精確。以之問世而利民。信今而傳後。其仁功爲何如乎。爰爲之敘識大概焉。

民國十九年全國醫藥界三一七紀念日孟河丁仲英撰於海上之尙志山房

序

鄉僻之處。醫藥鋪寥若晨星。危病痼疾。須要醫藥迫急。而良醫良藥。尤必力求。然鄉僻不可謂無良醫。而不可謂必有良醫。不可謂無良藥。然不可謂必有良藥。而危病危症。所須必欲良醫。所求必欲良藥。然偏僻之地。窘急之時。必良醫之必至。必良藥之必得乎。良醫不必得。而危病不因良醫不至而遂不作。良藥不必得。而危病不因良藥不得而遂不作。然則欲良醫必至。良藥必得。雖處鄉僻。猶若市鎮。雖無良醫。猶有良方。必致之無難者。其惟陸子所編萬病驗方大全乎。萬病驗方大全。編輯求覓。一方之得。先自試用。試而驗。珍若南金。如此二十年。都約萬餘方。方方金玉。字字珠璣。分門別類。眉目清爽。仁功所及。起死生而肉白骨。何難哉。

民國十九年四月 謝利恆序於滬寓甯康里

序

醫方之傳。由來久矣。如金匱石室。肘後千金諸方。皆爲世所重視。然而卷帙浩繁。散而無紀。倉卒之時。繙閱維艱。今者清潔先生。集古今之驗方。而考訂之。而分晰之。而彙輯之。對於救治良法。無方不全。使讀是書者。爽若列眉。洞若觀火。不可不謂之詳而備矣。在精於脈理者得之。苟能按症叅究。卽或不諳醫學者。亦可就症擇方。合宜而用。其有功於人世。豈淺鮮哉。

民國十九年四月十四日

武進丁濟萬謹序

序

千軍易得。一將難求。千方易得。一效難求。甚矣效方之難求。且國人天性深藏若密。一得祕方。視同無上之寶。終身衣食。賴此無憂。但求祕方常祕。焉顧遺失不傳。嗚呼。千方易得。一效難求。一效既得。猶守祕若此。乃我國醫藥進步之大障礙也。陸子清潔博學多才。以打破守祕觀念。自任所集效方。咸宣生平之祕。長途跋涉。勞碌探求。鏤肝鉢腎。精心結撰。費數十年心血。成此巨帙。開誠佈信。而爲醫藥昌明。盡瘁奉公。以爲沉溟慈航。然自視欣然。不敢自滿。然陸子雖自謙。吾知舉世效方。全在此矣。更知其大道必行也。

民國十九年四月

夏仲芳序於松江石幢子

序

夫醫非神祕之事。所謂常人苦不知醫者。不過不明察色辨脈。與夫治療之方法耳。其實有一病。必有一病之見症。有一症。必有一對症之藥方。雖精是業者。亦不得舍正軌而別求所謂辨症治療之途徑焉。對症之方維何。卽所謂經方是已。經方者。驗方也。除奇異怪症。及病在疑似間者。必須經醫生診治外。其餘一切經常之病。只須有經常驗方。按圖案驤。治之輒效。何必浪擲金錢。委命庸醫。獨是吾國驗方。向多視爲枕祕。蘭臺金匱。插血禁監。雖千金外臺之蒐輯。已非純粹驗方。自檜以下。更無足譏。然則欲求驗方。以治通常之病症。豈易言哉。豈易言哉。今陸子清潔。秉承家教。學有淵源。慨然有整理經方之志。纂萬病驗方大全一書。其爲言曰。經方者。尋常實用之驗方也。非驗方則不敢收。非尋常切實用之方。則不敢採錄。至於一切謬理悖倫之方。悉在屏棄之列。庶不致以珷玞混玉。以魚目亂珠。貽誤病家於無窮焉。余曰。善。斯編出。今而後。家置一冊。人手一篇。病家必不再有不知醫之嘆矣。豈非造福於無量哉。爰序數語歸之。

民國十九年四月

雲陽蔡陸仙序於上海醫廬

序

陸子清潔。今之醫傑也。好學深思。所學凜凜獨立。不輕附人。心尤仁慈。每見痼瘵之呻吟。沉湎之哀楚。輒思有以愈之。視人之疾苦。如炙親膚。無論貴賤。從不疏忽診治。醫風之佳。吾於陸子。嘆觀止矣。而於驗方。必百計羅致。虛心探討。未一日怠也。積年既久。所集效方。編成巨帙。厥名萬病驗方大全。夫仁慈如陸子。虛心如陸子。好學如陸子。其著是篇。復而不厭。用而不匱。行而不流。處而不底。盛德之至也。柳水澆漓。苦海慈航。吾於萬病驗方大全云爾。

民國十九年四月

唐長祺秉全序於松江醉白池

序

吾國醫藥之學。肇自神農。嘗百草以療民疾。此醫藥之始興時期也。迨後雖代有進步。由藥物療法。進而爲方劑療法。（數種藥物混合。成爲一方）然而無專書紀載。至漢代醫聖長沙張仲景氏。始集漢以前醫學之大成。而著傷寒金匱兩書。立有一百十三方。於是療法乃大備。此醫藥之鼎盛時期也。再後則醫家著述。偏於醫理方面。而注重於方書者。除劉涓子之鬼遺方。孫思邈之千金方。葛稚川之肘後方諸書而外。他無聞焉。而不知偏重醫理之著述。祇可作專門醫之研究。而不足供一般人之研究。此吾中國人民之所以無醫藥常識。缺乏個人及公共衛生之知識者也。清代鮑相璈氏。編有驗方新編。差足厭一般社會人之醫方常識。然降及現代。人類事業日繁。疾病亦隨之而變幻。執古方以治今病。似難有桴鼓之應。求有一完整之方書。供一般社會人之醫學需要。不戛戛其難乎。吾友陸子清潔。現代名醫也。有鑒於此。特編一萬病驗方大全。分別門類。朗若列眉。內有古方。時方。新方。均取其確有實效者而錄之。未經實驗及耳食之方。概不與焉。書既成。袖來示余。閱讀一過。覺其選擇之精審。編輯之完整。實足駕手鮑氏書上。前可以追古人。後可以惠來者。先生之書。可以傳矣。而先生之名。亦良足隨之不朽矣。將來造福於社會。豈淺鮮哉。因樂而爲之叙。

中華民國十九年四月十四日

張贊臣識於醫界春秋社

自序

智者千慮。必有一失。愚者千慮。必有一得。故名醫之處方。有時而窮。村嫗之單方。適當則效。非偶然矣。諺稱「單方一味。氣死名醫」。夫單方非能氣死名醫也。必單方神效。如鼓應桴。始足當之無愧。本書各方。苦心搜訪。南及閩粵。北至燕晉。風雨晦明。十易寒暑。而異僧奇士。祕不宣人之方藥。必百計以求之。一方之得。必先自試用。試而有驗。珍同拱璧。有歷數月不得一方。有一日間連獲數方。積之既久。乃編爲十有三科。包羅有系。或謂余篇有仲景之驗。千金之富。外臺之博。則余豈敢。余編是篇。聯供鄉僻之處。醫士寥落。藥舖未及所需耳。初無意問世也。平君襟亞。熱情殷殷。堅請付印。盛情難却。始從其議。然自審所編。掛一漏萬。在所不免。知我罪我。惟在博雅君子。

中華民國十九年三月

陸清潔序於滬寓

萬病驗方大全序

編輯大意

一本書將古今驗方博集成。以供世用。故名萬病驗方大全。

一本書收集各方宗旨。概以效驗爲標準。內凡一方之設。一藥之用。均歷經試驗而靈效者也。若未經試用。或試用而不效者。一概淘汰。以冀名副其實。讀者鑒編輯者之一片苦心。當如何珍視寶貴之。

一本書分篇。力求明晰。凡科門之下分系。一系之下分類。或一系而包容內外科病者。則另分內外二部。以冀愈覺明瞭。（如身各部病門。眼科門。耳鼻喉科門）

一本書內各病各方目錄均詳列方首。按圖索驥。翻閱時異常着目。

一凡平常單方書。祇述效驗如何。而此方之性質若何。或寒或熱。或虛或實。一無所明。使閱者明知其能治何病。而不敢試之。或服後而弊端百出。其故因既未明藥性。又不曉方義。本書力糾此弊。將每系各方。詳其性。明其用。（如用以解熱毒者。曰清熱解毒。用以辟穢濕者。曰辟穢類。補虛弱者。曰補虛。溫寒散陰者。曰溫運。要皆所以明其性。詳其用也。）使患病而不知藥性者。今均能應用如意。而萬無流弊矣。

一主症主方之下。亦有附方。名之曰又方。所以不另立方名者。省手續。而便於檢閱也。

一凡一系內之雜治類。所以名雜治類者。非不可分類也。乃因一二方而另立一類。則分類既多。徒亂人意。而無所適從。故本書中。分類約而欲切。別方明而用廣。然或關係大有出入。寒熱不可混淆。雖一二方者。亦不得不另立一類。所以鄭重立意也。閱者其可忽略乎。

【附註】雜治類係多數不可分類。或可分類而覺類數太繁。反不易明瞭之方。所集合者也。

一醫之爲學。乃人生性命之學也。醫學常識。人人所宜究心也。若病起於倉卒之間。一時無適效之方。將此書翻閱。按類而求。則奇方疊現。編者編此書之意。在普遍醫藥常識。爲生命作保障也。

萬病驗方大全總目

【內科門總目】

傷寒系	一
中風系	一二
風濕系	三五
痢疾系	四三
黃疸系	六二
瘡疾系	六七
痧症系	八〇
痧症例方系	一一三
痧症別類系	一三〇
霍亂系	一三二
中暑系	一四八
瘟疫系	一四九
瘴癘系	一五七

肺癆系	一五八
哮喘系	一六〇
咳嗽系	一六一
吐血咳血系	一八三
諸痰病系	一九四
心病系	一九七
腰痛系	一九九
大便秘系	二〇一
小便秘系	二一五
心胃肝氣系	二二四
噎膈系	二三一
呃逆系	二四一
脾胃積系	二四三
痞積系	二四八

【外科門總目】

三消系	二五一
癰脹系	二五四
肛門系	二六七
癰毒系	一
疔瘡系	七
瘡毒系	二六
瘡癰系	四七
外科雜治系	五一
痔瘡系	五三
大麻風系	六五
遊風丹毒系	六八
疹風系	七〇
瘤系	七一